

Premio Cultural Playa Pabao 2009 dedica na Robert Jeandor

ORANJESTAD(AAN)-

Diarason 18 di maart directiva di Centro di Bario Playa Pabao lo otorga premio "Cultural Playa Pabao 2009 na "Aruba su unico yiu" cu ta nada mas y na menos cu Robert Jeandor

Aki ta sigui e relato di e carera musical di Robert Jeandor como artista, cantante, musico, compositor y arreglista internacional. Robert ta e prome Arubiano cu a canta cu Sonora Matancera cu ta reconoci internacionalmente, y cu a sali tambe den e buki di historia di Sonora Matancera cu tur hende cu a participa cu e orquesta aki.

E motor tras di Robert su desarojo como musico for di chiquito tabata su difunto tata, Sr. Francisco Jeandor.

Tempo Robert tabata tin 5 pa 6 ana y cu na Radio Kelkboom tabata toca danzon cubano, son montuno, guaracha etc.

Robert tabata bati man riba ritmo di danzon cu e tabata gusta masha hopi.

Su tata cu a ripara cu Robert tabata gusta e ritmo ey a encurasha Robert pa sigui.

E mes tabata un guitarista masha conoci y cu a yega di toca tambe cu Julian Coco cu a bira un guitarista di taya mundial.

E rumannan mayor, Frank y Percy tabata tocadoman di guitarra, y tabata toca cu nan amigonan, entre otro Tito Flores -awe difunto-, cu a cuminsa den musico cu De Trupialen. Robert mes no a cuminsa cu guitarra.

El a cuminsa na toca cuarta y ta despues a pasa pa guitarra.

Su tata hasta a traha un tablero pe, pinta cu man riba carton, mustrand e notanan y con pa pone dedenan etc.

Musiconan di hotelnan a cuminsa bin cas, y Robert a cuminsa conoce nan y a sigui nan movicionnan y practica pa riba su mes busca pa bay dilanti.

Di su tata tambe el a haya un schrift cu akkoordnan di cuarta (venezolano) y a siña di esaki Tabata na 1963 cu su ruman Frank a hibe pa bay toca cu Blancas Palomitas di Tanki Leendert, grupo di aguinaldo e tempo ey bao direccion di Severiano Luidens (awe difunto) y su yiuunan Evelien y Jossy Luidens cu a cuminsa cu Blancas Palomitas.

No a dura mucho cu Albert Dieffenthaler a bin cas papia cune pa e bay television cu Albert pa toca tempo cu Tele Aruba a habri. Robert a toca cu Albert cu tabata riba piano y Robert cu cuarta/

Despues Robert a pasa pa Alma Solis cu Elvy "Vi" Maarten cu tocadoman y cantantenan, Chomon Boekhoudt, Pedro Arends, Percy Jeandor y Robert.

Despues a dreña Chemito Kelly. Robert, manera un "sardin", a keda landa mey mey di "bayenanan" musical den e oceano musical aki.

El a toca tambe cu Doodle Sofia y Fabian Willems, a toca den programan di Cultura y Educacion, program a di television di Ronny Marrugg (Cocktail Musical) di Tico Kuiperi (Show Time) -awe difunto-, y di Janchi Tromp (Lo Exclusivo) na television.

El a toca na Cactus Inn, pabao di Magic FM, Bali cu tabata dilanti Renaissance hotel di awe, Trocadero Bieu cu tabata unda awe tin e Crystal Casino, Basiruti bieu, POVA bieu, cual tabata unda awe tin Holiday Inn, na Strand hotel cu a bira Talk of the Town y na Manchebo.

El a sigui cu Los Juveniles cu Vito Oduber como manager, cu Vicente Kelly, y hopi

musico cu a keda cambia Mas o menos 12 aña el a keda cu Los Juveniles cu 13 aña a keda dirigi pa Vito Oduber. Aruba a haya bishita di varios grupo di fama mundial e tempo ey, manera Cortijo y su Combo, Gran Combo, La Dimension Latina, Tipica 73, Larry Harlow, Cuco Valoy, y varios grupo di salsa y merengue

Nan a mira Robert y bisa cu e tin cualidad pa traha internacional pasobra "Aruba ta chiquito pa Robert".

Johnny Ventura a papia cune, y bise cu e tin stem bon pa Gran Combo.

Tempo cu Andy Montanez a bay laga Gran Combo, el a canta cu Gran Combo cu a bin buske despues como cantante fiho.

Tabata tin problema di visa cu a tarda y Gran Combo a busca Jerry Rivas. Esaki tabata un chance grandi cu Robert a perde.

Johnny Ventura e ora ey a dicidi di bay cu Robert.

Larry Harlow, tempo ey cu Fania All Stars tabata den su gloria, kier a bay cu Robert pasobra el a perde Ismael

Miranda.

Larry Harlow tabata tin Nestor Torres cu no tabata sigur cu Nestor y kier a bay cu Robert, pero Johnny Ventura a bay cu Robert.

El a hinca Robert den Los Hijos del Rey cu tabata e grupo mas pega na Santo Domingo. Robert a haya longplay di Los Hijos del Rey di un amigo arubiano pero a tira e LP un banda y no kier a toca e longplay pasobra e no tabata cantante di merengue.

Su ritmo preferi tabata salsa Pero ora cu Johnny Ventura a conte di e grupo y su trayectoria, el a dicidi di scucha e longplay, y ta net cu e grupo aki cu el a nenga di scucha su longplay, el a bay canta internacionalmente.

Na RCA ora a tende cu Robert ta bay afo, e hendenan a bisa: "Ay ora e hendenan aki bay di Aruba, nan nan ta lubida riba bo."

Robert no a perde speranza, el a keda cu su fe di yega na toca unda Fania All Stars y artistanan grandi di salsa y merengue a toca.

E tabata prepara su mes, practica y move etc. den ensayonan na cas, caminda hende lo a kere cu ta loco eta den camber.

Na Januari 1979 trahando na Antillian Mercantile (Unicon bieuw) patras di Royal Plaza, Johnny a yame pa e bin otro siman

Tabata problema di trabao pe, pero su hefenan y companeronan a apoye y sostiene. Cu 8 ana di trabao sin nunca a tuma vacacion, nan a lague bay cu puesto habri Robert a yega St. Domingo diamars anochi, train diarazon mainta, y tabata un cancion di Los Juveniles "La negra salsera" pero cu areglo nobo, y merdia el a bay toca na television unda el a bin conoce e otro tocadoman den "El show de Mediodia".

Radianan a cuminsa comenta di Robert, y net ora cu e mester a bolbe Aruba.

Pero mal tempo a pone cu airport a cera y Robert mester a keda mas dia y a bay canta tur caminda cu e banda Los Hijos del Rey, e weekend ey.

E arubiano mey mey di Dominicanan y puertoriquenonan a cuminsa haya elogio y admiracion.

Robert a keda 2 1/2 aña cu e banda.

Su cancion salsa "Puchula" a keda 7 luna riba hit-parade y sali salsa di ana.

E prome cancion internacional graba di Robert tabata "El Viento" otro salsa y esun cu a pega masha duro mes cu a yega na hiba Los Hijos del Rey Madison Square Garden 3, 4 biaha na New Yorktabata "yo me

Sigui lesa Pg. 36

Continuacion pagina 30

dominicanizo".

Cu Hijos del Rey el a bay Madison como 6 biaha y cu Johnny Ventura mas o menos 8 biaha.

El a canta den e Madison Square Garden grandi di New York, di 24 mil hende y e parti yama Felt Forum cu ta carga 15 mil hende.

Den e Big, e grandi, el a canta 5 biaha y den e chiquito mas o menos 9 biaha.

El a biaha pa varios pais di Europa cu Los Hijos del Rey y despues di problema di e banda na Puerto Rico, ni 20 minuut despues Wilfrido Vargas a yama Robert pa e traha cu Wilfrido.

Roberto Roena, e ex bongocero di Fania All stars, e mes madrugada a yama tambe pa Robert traha cune den su banda.

Robert no a bay cu Wilfrido ni cu Roena.

Papito Jalajala (di e cancion Jalajala) tabata kier pa Robert keda Puerto Rico, pero Robert a dicidi di keda cu Johnny Ventura cu e no kier a defraudar- como gratitud- y cu a yama Robert tambe.

Robert a bin Aruba unda su sefiara a dun a luz y Johnny Ventura despues a yame na 1982. Den mas o menos 10 luna Robert tabata biaha pa Santo domingo na varios ocasion, te cu finalmente el a keda Sto. Domingo cu Johnny Ventura.

Cu Johnny Ventura Robert tabata tin exitonan grandi y a biaha especialmente pa Merca tocando tur rond di Merca.

El a toca den Coliseo Roberto Clemente na Puerto Rico tambe, den Alto de Chavon y Palacio de Deportes na Santo Domingo, Stadion Olimpico, Sto Domingo, den Carnegie Hall na New York, den Radio City Music Hall, den Madison, den stadion di Hollywood unda tur artista grandi ta toca, den e centronan di mas grandi na Miami, "Ta. Miami", unda Willie Colon, Johnny Ventura, Conhunto Quisqueya a toca hunto.

El a toca na Villa del Mar na Chile, (e di dos arubiano, — despues di Julio Euson) Aki e banda a gana Antorcha de Plata.

Na Colombia a gana Congo di Oro cuatro biaha cu Johnny Ventura, tocando tambe na Barranquilla den Coliseo, na Bogota, Medellin, Cali, y varios lugar mas na Colombia.

Na Colombia el a pega e cancion "Rebecca" cual tabata riba e LP di Johnny Ventura, "Flying High".

E cancion a cosecha exito grandi na Panama tambe.

Na Panama "Rebecca" tabata asina grandi cu Johnny Ventura a manda busca Rob-

ert na Sto. Domingo pa sea como sea, e percura pa e ta na Panama prome cu 6 or atardi, apesar cu Robert tabata riba cama cu operacion di breuk.

Drumi den avion riba asientonan di patras el a bay Sto. Domingo, Miami, Panama.

Na Miami e empresario di fama Nestor Zavala a topa cune y a percura pa e por a pasa su periodo di estadia mas comodo y pre para tur cos pe pa sigui su biahe.

Na Panama, Robert nunca a pensa di lo mira asina tanto hende na aeropuerto, entre nan periodistanan, y fanaticonan di "Rebecca" pa ricibi'e.

E anochi ey, — segun tradicion di Panama, — asina cu a toca e tema mas pega, cual a resulta di ta Rebecca, tur hende ta hisa paraplú y esey ta loke Robert a logra aki.

Cu Johnny Ventura el a toca riba barco, tambe. Robert a acompaña Celia Cruz mas o menos 10 biaha como bahista y como corista.

El a acompaña Johnny Pacheco como corista schouder pa schouder, cosnan cu no ta tur artista di Aruba por logra asina asina.

Robert tabata e prome cantante di tumba di carnaval cu a gana e concurso di tumba 3 biaha tras di otro.

Robert a siña hopi cerca Rufo Odor, unda el a siña den canto, y siña musica, lesando musica. Eddy Bennet awe difunto tambe tabata un maestro di Robert Jeandor y a contribui den desaroyo musical di Robert Jeandor...

Un di e expresionnan cu casi ningun hende sa na Aruba tabata tempo cu Angel Job,

awe difunto, tabata tin su programanan di television na Corsow, Show di Job", cu a bisa Johnny Ventura "si Robert Jeandor triunfa, boso tene y no lague bin Aruba, ami ta paga su pasashi y ni boso ni Robert ta saca un cent". No a dura mucho cu Johnny Ventura a pone Angel Job na altura cu "el hombre triunfo" y Angel Job amanda pasashi pa Robert bay Santo Domingo.

Otro persona cu Robert mester tin den su curriculum menciona, ta Lhando Garcia, "el sanito" cu a forza pa Johnny Ventura papia cu Robert, bisando e: "bin wak un guy cu ta canta na Aruba dia bo bin aki," y Johnny a yega Aruba y a bay scucha Robert y Lhando ta esun cu a bisa Johnny Ventura "wak kico bo haci, pero bay cu e guy aki"...

Robert sigur tampoco por laga afo Billy Bikker cu a pone Robert Jeandor canta cu El Gran Combo, tempo cu

Gran Combo a bini Aruba cu su exitonan "El barbero loco", "Ojas blancas", "Pin pin" y a toca den Club Caiqueto.

Di e artistanan grandi internacional e no por keda sin menciona nunca nomber di Bobby Valentin, cu mester a bini Aruba pa festival di Jazz cu otronan di Fania, manera Johnny Pacheco, Barreto, y Giovanni Hidalgo. E tempo ey Roberto Roena no por a bini debi na problema cu husticia y Bobby Valentin a haya problema pa bini Aruba cu vuelo...

Bobby a menciona di su problema y a recomenda pa nan acerca Robert na Aruba.

Johnny Pacheco amanda busca Robert urgentemente. Bobby Valentin tabata e persona cu a pone tur placa pa Robert por a saca su prome LP internacional como Robert Jeandor.

Bobby tabata e productor ehecutivo di e LP.

Robert na su cas a ricibi e yamada di Johnny Pacheco, y a contesta:

"Sapato Viejo" Kiko... y mes ora mas o menos 2 or Robert a bay pa e por a ensaya cu e seisanan di Fania den Mansur Ballpark

Por corda ainda con Aruba tabata tin su orquesta "All Stars di Aruba" y no a inclui Robert den e "All Stars", pero porta di mas grandi den America Latina a habri pa Robert, e porta di Salsa cual tambe a bin tapa cu un candal di mala suerte.

Robert a ensaya cu e 6 nan di Fania all Stars, y varios musico Arubano cu a haya chance pa dreña stadion toch, a pesar cu a prohibi hende di dreña, a keda boca habri.

E candal a cera 6 or atardi pa Robert pasobra Bobby Valentin a yega Aruba toch y a ocupa su puesto den e agrupacion.

Importante aki tabata cu Robert Jeandor a wordo acepta entre esnan mas grandi di salsa, Fania All Stars, un arubiano cu a wordo busca na Aruba debi na e nomber internacional cu e tabata tin.

Robert tin premionan e logronan grandi di salsa y merengue cu a pega. Disconan di Golden Series di Cartagena, disconan di oro di Tommy Olivencia, y cu Robert a forma parti como areglista y bahista "25 Aniversario"...

Robert a graba riba CD cu Juan Luis Guerra, cinco produccion y a gana Grammy americano cu "Bachata Rosa".

El a graba como corista, bahista y maraca cu Juan Luis Guerra. Nunca Robert tabata kier a toca cu Juan Luis Guerra.

E por a toca cu Juan Luis Guerra na Venezuela pero no

Continuacion pagina 36

por a bay debi na tantisimo trabao di produccionnan den studionan dominicano, y ta

net durante e gira ey Juan Luis Guerra y su integrantenan a haya desgracia tambe. Den

henter e relato aki no a menciona e mas di mil grabacion cu Robert a haci den studionan na Sto. Domingo y Puerto Rico, pa cantidad di orquesta y artistanan grandi, como tecnico di studio, corista, bahista y den percusion, locual lo a haci e relato aki hopi mas largo ademas di otro puntonan cu no a menciona di su trayectoria debi na espacio.

Robert a bolbe Aruba y den añanan final di decada 80 a

forma su Robert y su Solo Banda Show.

Mescos cu banda hopi banda, e Solo banda Show di Robert a cuminsa gatea den club Blue Wave y cu awe ta e unico orquesta completo di nos isla y cu nunca a dreña den direccion di electronica y computadora den su banda. Solo Banda Show ta existi pa 17 aña caba. Nan tin varios CD graba.

Den Carnaval Robert y Solo Banda Show ta e house band di Los Laga Bai pa 16 aña caba.

Por menciona cu Robert y Solo Banda Show ta toca durante aña na concierto, bruid, fiesta priva, fiesta publico y asina por sigui menciona.

Mirando e trayecto artistico aki directiva di Centro di Barrio Playa Pabao ta otorga "Premio Cultural Playa Pabao 2009" na Robert Jeandor. Esaki lo tuma lugar durante un evento cultural cu lo tuma lugar diaranzon 18 di Maart na Centro di Barrio Playa Pabao. E actividad aki ta cuminsa pa 5 or di atardi y lo termina pa 10 or.



PLAYA PABAO A RINDI HOMENAJE NA E GRAN MUSICO INTERNACIONAL ROBERT JEAND'OR...

** Robert Jeand'or, e prome musico Arubano cu a forma parti di un orquesta internacional, e prome musico Arubano cu a presenta den e mundialmente famoso Madison Square Garden cu e orquesta di Johnny Ventura, a ricibi merecidamente su reconocimiento for di su propio hendenan di bario Playa Pabao dura, te e grandioso celebracion di Himno y Bandera. Centro di Bario Playa Pabao tabata bon bishita, demostrando asina tambe nan apoyo di aprecio pa nan yiu di bario. Un bunita boto miniatura cu e colorman di nos orguyo bandera tabata e simbolo di reconocimiento pa e gran musico Arubano Robert Jeand'or, cual a ser entrega pa e dinamico presidente di Centro di Bario Playa Pabao, Sr. Dennis Burke. Den presencia di gran parti di e popular famia Jeand'or, e ceremonia di reconocimiento a tuma lugar y despues cu Sr. Dennis Burke a expresa su palabranan, un Robert sumamente emoshona y hasta na un momento cu awa na



wowo a gradici tur esnan cu a motive pa su exitoso carera musical internacional. Manera fotonan mes ta ilustra, e reconocimiento aki a ser altamente aprecia cu un tremendo fiesta anima pa e propio Robert y su Solo Banda Show. PABIEN ROBERT JEAND'OR...